

Bermaafan manifestasi Hari Raya UNISSA



ANTARA mahasiswa UNISSA yang hadir pada Sambutan Hari Raya Aidilfitri dengan konsep 'Open Booth' (Gerai Terbuka) yang disediakan oleh Fakulti-Fakulti dan Pusat-Pusat di UNISSA (kiri dan kanan).



Siaran Akhbar dan Foto : Universiti Islam Sultan Sharif Ali

BANDAR SERI BEGAWAN, Selasa, 11 Julai. - Kemeriahan Sambutan Hari Raya Aidilfitri masih dirasakan oleh semua lapisan masyarakat di negara ini. Kunjung-mengunjung serta bermaaf-maafan adalah merupakan manifestasi daripada sambutan Hari Raya Aidilfitri itu sendiri. Dalam sambutan Hari

Raya Aidilfitri itu juga bermacam aneka juadah dihidangkan untuk dinikmati oleh para tetamu.

Dalam kesempatan ini, Universiti Islam Sultan Sharif Ali (UNISSA), melalui Bahagian Hal Ehwal Pelajar (HEP) dengan kerjasama Majlis Perwakilan Pelajar (MPP) tidak ketinggalan untuk sama-sama memeriahkan Sambutan Hari Raya Aidilfitri

dengan konsep 'Open Booth' (Gerai Terbuka) yang disediakan oleh Fakulti-Fakulti dan Pusat-Pusat di UNISSA.

Majlis berlangsung di Dewan Auditorium universiti berkenaan di Gadong.

Hadir selaku tetamu kehormat, Rektor UNISSA, Dr. Awang Haji Norarfan bin Haji Zainal yang seterusnya memulakan upacara

dengan mengunjungi setiap gerai yang disediakan.

Majlis sambutan adalah bertujuan untuk mempereratkan lagi hubungan silaturahim dalam kalangan mahasiswa / mahasiswi itu sendiri dan juga para pensyarah dan pegawai serta kakitangan UNISSA. Selain itu, ia juga bertujuan untuk memperkenalkan kepada pensyarah atau pelajar asing yang bertugas atau mengikuti pengajian di UNISSA tentang budaya Orang Brunei di dalam menyambut Hari Raya Aidilfitri.

Suasana Hari Raya UNISSA dimeriahkan lagi dengan cabutan bertuah dan pertandingan dekorasi booth tercantik di samping persembahan tausyeh dari mahasiswa UNISSA.

Pada tahun ini, booth tercantik dimenangi oleh gabungan Pusat Penataran Ilmu dan Bahasa dan Fakulti Usuluddin.

Majlis tersebut juga telah dihadiri oleh beberapa duta-duta dan wakil daripada Kedutaan Besar dan Perwakilan Asing di Negara Brunei Darussalam serta pegawai-pegawai kanan dari Kementerian Pendidikan Negara Brunei Darussalam.

Empat produk ubat tradisional dicemari bahan terlarang

Siaran Akhbar dan Foto : Kementerian Kesihatan

BANDAR SERI BEGAWAN, Selasa, 11 Julai. - Kementerian Kesihatan memaklumkan kepada orang ramai supaya tidak menggunakan empat produk ubat tradisional dan suplemen kesihatan yang mana hasil dari ujian makmal Perkhidmatan Makmal Farmasi, Perkhidmatan Makmal, Kementerian Kesihatan telah mendapati bahawa produk-produk tersebut telah didapati dicemari dengan bahan racun berjadual dan ubat-ubatan barat yang tidak diisytiharkan.

Produk-produk berkenaan adalah *X-Stive Men 400M 400mg Capsule* yang dikilangkan oleh Stive Health Inc, U.S.A telah dicemari dengan Sildenafil; *Al-Barakah Ayam Selasih Pil* di bawah pengilang Kampung Gulau, Mukim Sok, Sik, Kedah didapati dicemari dengan *Dexamethasone*; produk *Pee Pa Wan Pill* dan *Slimming Booster Capsule 350mg* yang tidak dinyatakan nama pengilang masing - masing

telah dicemari dengan *Chlorpheniramine* dan *Sibutramine & Phenolphthalein*.

Bahan-bahan pencemar dalam produk-produk berkenaan boleh mengakibatkan kesan-kesan mudarat yang membahayakan kesihatan.

Sildenafil adalah ubat yang digunakan untuk merawat mati pucuk yang memerlukan preskripsi doktor. Antara kesan-kesan sampingan apabila memakan ubat-ubat tersebut ialah merasa mual, muntah-muntah, muka kemerahan dan pening. Dalam kes-kes yang teruk, ia juga boleh menyebabkan peningkatan yang luar biasa dalam degupan jantung, kehilangan pendengaran secara tiba-tiba dan sawan.

Penggunaan kortikosteroid *Dexamethasone* secara berpanjangan tanpa pengawasan boleh menyebabkan peningkatan pada paras glukosa dalam darah yang mengakibatkan kencing manis, tekanan darah tinggi,

katarak, penyakit otot dan tulang, serta meningkatkan risiko jangkitan yang teruk. Penggunaan kortikosteroid dalam jangka panjang juga boleh mengakibatkan *Cushing's syndrome* yang mana dicirikan dengan muka bulat atau *moon face*, serta kegemukan pada bahagian badan dengan anggota kaki dan tangan yang kecil. Pengguna yang telah mengambil dos steroid yang tinggi dalam tempoh masa yang lama mungkin mengalami gejala yang termasuk keletihan, sakit otot dan sendi, demam, kadar gula dalam darah rendah, tekanan darah rendah dan dehidrasi.

Pening, tekanan darah menurun, denyutan jantung yang tidak menentu, kekeliruan, kemurungan dan sawan adalah antara kesan-kesan *advers* yang boleh terhasil dari penggunaan *Chlorpheniramine* tanpa pengawasan.

Sibutramine adalah agen pelangsing badan yang tidak lagi disarankan penggunaannya dalam rawatan obesiti kerana kesannya yang boleh memudaratkan jantung dan hati. Pengambilan *sibutramine* juga boleh menyebabkan kesan *advers* yang serius seperti tekanan darah tinggi, denyutan jantung yang tidak menentu dan sukar untuk tidur; dan dalam kes-kes yang paling teruk, ia boleh menyebabkan kerosakan pada buah pinggang dan hati.

Manakala itu, penggunaan berpanjangan dan berlebihan bahan, *Penolphthalein* boleh menyebabkan cirit-birit dengan kehilangan air dan elektrolit yang berlebihan serta juga kemungkinan berlaku kegagalan atonic kolon, masalah pernafasan dan jantung, kerosakan renal serta kesan-kesan sensitiviti kuat yang dilaporkan dengan penggunaan bahan berkenaan.

Kementerian Kesihatan tidak pernah mengeluarkan kebenaran ke atas pengimportan bagi penjualan produk-produk tersebut. Berikutan dapatan ini, produk-



X-STIVE Men 400M 400mg Capsule.



AL-BARAKAH Ayam Selasih Pil.



PEE Pa Wan Pill.



SLIMMING Booster Capsule 350mg.

produk berkenaan adalah dilarang untuk diimport dan dijual di Negara Brunei Darussalam.

Orang ramai yang telah membeli atau memakan produk-produk tersebut adalah dinasihatkan untuk memberhentikan pengambilannya dengan serta merta. Jika mereka mengalami kesan *advers* dan merasa tidak sihat selepas memakan produk-produk berkenaan, hendaklah berjumpa doktor dengan segera.

Orang ramai yang terlibat dalam penjualan produk-produk tersebut (termasuk penjualan secara *online* seperti melalui Facebook dan sebagainya) adalah diingatkan bahawa ia adalah menjadi satu kesalahan di bawah Akta Racun 1956 untuk menjual mana-mana produk yang mengandungi bahan yang dikawal di bawah Akta berkenaan dan boleh dikenakan denda sebanyak BND8,000 atau penjara enam bulan, jika didapati bersalah. Tambahan pula, jika seseorang melakukan sesuatu di atas kecuaiannya sendiri yang

membahayakan atau mungkin membahayakan nyawa manusia, jika didapati bersalah, akan didenda sebanyak BND16,000 dan dua belas (12) bulan penjara.

Kementerian Kesihatan juga ingin memohon kerjasama dari orang ramai untuk melaporkan kepada Perkhidmatan Peraturan-Peraturan Kesihatan jika mendapati produk-produk berkenaan masih dipasarkan di negara ini.

Untuk maklumat lanjut dan perhubungan lanjut, orang ramai boleh menghubungi Perkhidmatan Peraturan-Peraturan Kesihatan melalui talian telefon 2384182, menghantar e-mel kepada health.regulations@moh.gov.bn atau berjumpa terus Pegawai Penguatkuasaan di Perkhidmatan Peraturan-Peraturan Kesihatan, Tingkat 1, Kementerian Kesihatan, Jalan Menteri Besar, Negara Brunei Darussalam.

Penutup Kursus Ibadat Haji, 14 Julai ini

Siaran Akhbar : Kementerian Hal Ehwal Ugama

BANDAR SERI BEGAWAN, Selasa, 11 Julai. - Jabatan Urusan Haji, Kementerian Hal Ehwal Ugama memaklumkan kepada bakal-bakal jemaah haji yang terpilih untuk menunaikan fardu haji bagi musim haji Tahun 1438 Hijrah / 2017 Masihi bahawa Majlis Penutup Kursus Ibadat Haji dan Doa Selamat bagi Bakal-Bakal Jemaah Haji Negara Brunei Darussalam akan diadakan pada hari Jumaat, 20 Syawal 1438H bersamaan dengan 14 Julai 2017M.

Majlis tersebut akan diadakan di Dewan Persidangan Utama, Pusat Persidangan Antarabangsa, Berakas bermula jam 7.30 pagi.

Sehubungan itu, semua bakal jemaah haji yang telah terpilih untuk menunaikan ibadat haji tahun ini adalah dikehendaki untuk hadir bagi mengikuti majlis tersebut.